

THE UNIVERSITY OF CHICAGO

THE UNIVERSITY OF CHICAGO

欽定剿平捻匪方略卷七十二 己未年

中央民族
學院圖書

十二月初四日 己亥 德楞額奏言皖捻嘯聚

西永東之間圍攻濰口大營勢甚猖獗臣派練

總吳鉉帶領鄉勇二三萬人在景山扼紮以爲

聲援詎意賊勢過衆鄉勇登時潰散又恐該逆

抄襲我軍後路是以退紮韓莊北岸以固山東

門戶幸運河水漲該逆不能長驅直渡惟北岸

兵力太單臣已催令嶧縣知縣鄒崇孟趕緊調集團練隨同堵剿並飭隨營之兵經歷鄒蔭廉等在運河八牖分段嚴防十一月二十二三等日該逆乘閒偷渡當被練勇拏獲二十餘名卽行訊明正法其餘練勇隨同馬隊過河追剿斃賊三四百人賊勢紛紛敗竄二十五日兗州鎮總兵雙齡帶領馬步官兵馳抵韓莊赴柳泉茅

村一帶搜捕餘匪生擒賊目二人殲斃數十人
敗匪遠竄運河南岸一律肅清臣連日督勦感
受風寒瘡疾未就痊恐該逆飄忽無常此擊
彼竄卽而囑雙齡如有警信迅赴韓莊協同防
剿查防禦碩隆武委驍騎校伊勒哈春力戰捐
軀殊堪憫惻應請

旨交部照陣亡例議卹至此次勦匪出力之官紳弁勇

容臣擇尤請獎之處出自

恩施

德楞額又奏言臣查管帶綏遠城官兵之協領
德福佐領德博克帶兵甚不得力相應請

旨將德福摘去頂戴德博克革職留任以觀後效管帶
吉林四起官兵之佐領盛恩委參領春全傷病
未痊應請

旨飭令回旗當差伏乞

飭撥吉林黑龍江馬隊五百名迅速來東以資攻剿其
綏遠官兵素稱疲弱祇可留營藉壯聲勢庶於
防剿兩有裨益奏入

上命軍機大臣傳諭文煜德楞額曰據德楞額奏請調
吉林黑龍江馬隊五百名助剿等語該二處馬隊頻
年調赴各路軍營爲數不少現已無可再調前曾諭

令瑛榮關保卽飭黃良楷由永城管帶兵勇二千名
回至韓莊等處隨同防剿其前次調往勝保軍營之
馬隊五百名克復懷遠後本應調回韓莊嗣因傅振
邦離口防堵喫緊諭令袁甲三將此項撥赴該提督
軍營著文煜德楞額探聽濰口等處如情形稍鬆卽
知照袁甲三傳振邦將勝保前調馬隊五百名迅速
調回以資截剿逆蹤飄忽靡常雖暫時擊退防範未

可稍疏德楞額瘡疾未痊著探有警信卽飭總兵雙齡帶兵前往助剿該撫仍飭地方官激勵鄉團以輔兵力毋令捻蹤北竄

上諭內閣曰皖捻出巢竄擾逼近東境經德楞額督率兵勇擊退運河南岸肅清剿辦尙爲得手陣亡之防禦碩隆武委驍騎校伊勒哈春均著交部照例議卹所有在事出力官紳弁勇著德楞額擇尤保奏數員

以示鼓勵

上又諭內閣曰管帶綏遠城官兵之協領德福佐領德博克帶兵甚不得力德福著摘去頂戴德博克著革職留任以觀後效管帶吉林官兵之佐領盛恩委參領春全均著飭令回旗當差

初七日壬寅署漕運總督聯英江南河道總督庚

長奏言據傅振邦咨稱滄南逆捻復出滋擾且

欽攻撲碭山之唐家集宿遷之洋河鎮又據徐州鎮道稟報捻逆於十一月十三日出巢分爲兩股一竄蕭境之青里等集一趨宿州之濉溪口於濉口大營三面築圩約三十餘座並踞住濉口上流勢甚猖獗北路情形喫緊傅振邦業已派兵繞截惟大營腹背受敵該提督派出兵勇無多實有顧此失彼之虞嗣又探聞該逆大

隊直撲景山經德楞額派隊迎擊該匪復竄柳
泉等處邳州知州張富年會同河標兵勇馳抵
黃林莊該匪於二十一日在韓莊對岸搭造浮
橋意欲北渡先後經官兵擊退臣等查東路宿
桃完善之區向爲賊所覬覦賊之前隊旣爲水
阻難保不鋌而走險現在無兵可調惟有責成
地方文武酌帶兵勇並激勵團練互相聯絡庶

保無虞至天長踞賊負隅如故盱眙以南徧地
賊蹤所有漕河兩處派防兵勇及安勇一軍均
在三河及衡陽一帶扼守當此嚴寒之際誠恐
河水凍結賊匪乘夜偷渡關繫匪輕自三河以
至衡陽東西百餘里沿河分守實形單薄臣等
惟有嚴飭在防鎮道督率員弁兵勇晝夜梭巡
認真防守並豫備船隻隨時敲冰以杜偷越奏

八

上命軍機大臣傳諭聯英庚長曰該署漕督等以宿桃
完善之區責成地方文武擇要布置並飭安勇等嚴
防衡陽一帶豫備船隻隨時敲冰免致偷越所籌均
尙妥協惟前據德楞額奏韓莊前有銅山縣練總
吳鏹之勇二三萬人向稱精銳因馬賊紛至練勇望
風披靡等語此項練勇著聯英等查明現係何員管

帶如不得力卽著酌量裁撤

同日翁同書奏言逆匪經官軍痛創後分竄鑪
橋胡家圩等處當飭副將尹善廷等率領兵練
迅速進攻我軍先攻鑪橋該逆恃有胡家圩逆
黨爲援守禦稍懈尹善廷密募嚮導乘夜渡河
直襲鑪橋賊營並知會各軍分路進攻斃賊無
數胡家圩之賊前來接應尹善廷知賊勢已分

卽選派精銳直撲胡家圩逆壘該逆聞風回救
我軍已齊抵壘邊施放噴筒火箭登時火起我
軍緊堵壘門未容賊匪竄出該逆回救之衆又
經我軍分隊追殺砍斃甚多立將胡家圩逆壘
三座踏毀嗣據探報捻首張落刑龔得現復與
粵逆合謀由六合天長等處調回逆衆數萬意
欲協守鑪橋牽掣我師一面由南路繞撲壽州

龔逆率領賊隊數千竄至瓦埠一帶又廬郡賊衆前於十一月十八九等日突出萬餘向西竄擾已至壽州之高劉集地方又據署合肥縣知縣英翰稟稱廬州竄來之賊約有一萬餘人二十一日攻破王家圩高劉集並分竄雷麻店一帶署合肥縣知縣英翰督率勇練援剿該逆糾衆迎拒復出另股抄襲我軍之後適練總周盛